

福建通志

第肆拾肆冊
金石志

K295.7
1

福建金石志卷九

石八

宋四

薛敏季等蒼玉洞題名

在汀州

建炎元年

三山薛敏季鑑湖詹子雍樵溪上官德父黃德厚同游建炎丁未七月廿四日

蘇公才等蒼玉洞題名

在長汀

建炎二年

臨汀郡守蘇公才率幕官方安國李箕長汀丞鄭公才寧化簿黃固長汀令黃渥訪募巡社至東禪之石門建炎二年正月廿六日

嗣濮王仲湜題名

在侯官烏石山

建炎四年

建炎庚戌正月二日因禮神光寶塔遍遊烏石精藍乘興造西禪寺歷覽

勝概而歸男士街士術士程妖士鴈婿廖虞弼侍行皇叔祖少傅開

府嗣王仲湜巨源書

衍案宋史仲湜字巨源爲濮安懿王孫楚榮王宗輔子熙寧十年知西
外宗正事欽宗嗣位召知大宗正事未行汴京失守康王卽帝位于南
京仲湜率衆徑謁時嗣濮王仲理北遷乃詔仲湜襲封紹興七年薨子
士從士街士錢士衍士歆今題名士街士衍外有士術士程而無士錢
士歆自不能以士術士程爲非仲湜子攷宋史宗室世系表仲湜名下
一層首列士從次列士街三列士術四列士錢五列士衍六列士程較
題名多出士從士錢二人或仲湜子不止五人士歆與士程中隔兩人
必非仲湜子而士歆爲副濮王列傳或因此而誤也至馮志謂士衍爲
房國公仲曉子見世系表今世系表無之陳略謂此題有士術士程而
無士錢士歆其爲更名或史誤不可知然四名均列表上同在一層何
更名之有至謂仲湜兼判大宗正事爲紹興初年又謂建炎中尙未授
西外宗正皆大誤不知何所據而云然

三山志云西禪寺永欽里號怡山一名城山寺壓其上古號信首卽王

霸所居隋末廢圯咸通八年觀察使李景溫招長沙瀉山僧大安來居起廢而新之十年改名清禪尋又改延壽十四年賜紫方袍號延聖大師命劔南寫開元藏經給之後唐長興中閩王延鈞奏名長慶淮兵焚燬獨佛殿經藏法堂西僧堂僅存皇朝天聖間營葺始就周垣九百丈爲屋三十楹景祐五年勅號怡山長慶政和八年余少宰深奏爲墳寺賜額廣因嗣祖宣和元年改爲嗣祖黃錄院建炎元年仍舊

陳忠肅公祠記

在沙縣

建炎四年

建中之初右司諫陳瑩中論蔡氏兄弟忤旨竄嶺表公之南遷不以其罪舉天下憤惜之無敢言者名隸黨籍餘二十年轉徙道途無寧歲卒以窮死初京官翰林承旨以詞命爲職潛奸隱慝未形於事雖未通顯世之人蓋莫知其非也公於時力言京不可用用之必爲腹心患宗社危未可知也聞者往往甚其言以爲京之惡不至是已而陰結嬖幸竊國柄矯誣先烈怙寵妄作而宗社禍悉如公言於是人始服公爲誓龜也昔王荆公安

石以學行負時望神宗皇帝用叅大政士大夫相慶於朝謂三代之治可
以力致呂公獻可獨以爲不然抗章論之雖文正溫公猶以爲太遽欲獻
可始緩之未幾多變更祖宗故事以興利開邊爲務諸公雖悉力交攻之
矣能奪其流毒至於今未殄也故溫公每謂人曰獻可之先見余所不及
心誠服之余以謂公之于京言之於未用之前獻可之於荆公論之於既
用之後則公之先見於獻可有光矣二公之言蓋異車而同轍也靖康初
朝廷欲盡復祖宗之舊而一時故老無在者天子念公之忠追贈諫議大
夫官其四子所以寵嘉之甚厚此非私于陳氏蓋將以風勵臣節也而公
之邑人乃相與卽縣庠爲祠堂以奉祀公堂成屬余爲記余曰公之德業
足以澤世垂後雖不用於時而其流風餘韻猶足以立懦夫之志蓋天下
士非一鄉可得而擅也然居今之世流離擯斥其施不廣而邑之士大夫
誦其書尊其道使節秉義繼其風烈時有人焉則功施於其鄉爲多矣古
者有功於人則祀之則公之祠當載祀典以遺來世是宜書乃爲之書建

炎四年八月四日龍圖閣直學士朝散大夫楊時記

馮志云中立高宗時初除工部侍郎乞外以龍圖閣學士提舉洞霄宮
見宋史建炎四年正致仕時也

甌粵銘

有序

在建安

紹興初

建炎四年秋甌賊范汝爲嘯聚同源統制官李捧帥師輕進而沒朝廷遣
官招撫乃請留屯萬人賊勢益張凌轢郡縣莫敢誰何郡盜歆艷環視蜂
起紹興改元之冬遂據建城以叛部勒黨與焚掠諸邑破邵武犯南劍氣
燄熾甚福帥程邁以聞上命左中大夫參知政事孟庾爲宣撫使檢校少
師武成威德軍節度使韓世忠副之總神武步騎兵三萬水陸並進既次
近境賊猶抗拒屢戰屢捷徑薄城下猶負固不服攻圍累日乃始克之仰
體仁聖好生之德寬釋脅從老稚士女安堵如故剽殄賊黨以巨萬計分
遣偏師掃蕩巢穴餘盜以次討定一方救寧惟甌粵爲天下至險其民尙
氣而好鬪脅以盜威失其常產相挺爲亂自相屠掠不可勝數及王師削

平其徒盡殲誅殺之慘必有所致非偶然也議者謂愚民不知逆順之勢
因循至此而釋氏之流則謂甌俗生子僅留一二餘悉溺之二百年間所
殺幾何因果報應理所宜然二說雖殊實相表裏原其不明君臣之義蓋
緣不篤父子之恩孝慈忠義本由一心更無別法乎居於父子之間無虎
狼之仁則臨變故之際責其守節而不爲亂豈可得哉樂羊食子以爲羹
而文侯疑之易牙殺子以適君而管仲非之所厚者薄則無所不薄因果
報應所不論也避地閩中具見始末欲以藥石之言願著勸戒稍革其風
乃作銘曰

人之大倫惟君與臣尊卑既定其誰敢干閨門之內父子天屬德惟怙恃
忘在鞠育爲父戕子爲臣叛君逆道悖理何以爲人鬼神所誅天地不祐
刀兵剪殲其孰能救相彼甌粵民俗剽悍負氣尚勇輕生喜亂巨盜挺之
蜂附蟻從曾未期年同惡內訌王師之來如雷如霆討叛舍服千里震驚
蝟蝟斧螳猶敢強拒轉戰逐北嬰城之固怒其穀麤以抗裔嶽翹其萌芽

以激霜雹肥牛償豚一舉碎之宥彼脅從戮其鯨鯢兇徒逆儔尸相枕藉
天威所臨敢有違者君臣以義父子以恩克篤父子乃明君臣咨爾國民
自今以往愛育子孫尊君親上焚爾甲冑折爾戈兵服勤耒耜以保爾生
孝慈以忠砥礪名節勒名山阿敢告耆耄

輿地碑目云李綱撰在建寧府

雍正通志云刻在建安又有一刻在福州

子綱等鼓山題名

在閩縣 紹興元年

昭武李綱伯紀邀華陽王仲疑豐甫建溪吳嚴夫民瞻臨川陳安節巽達
淮海周靈運元仲遊鼓山靈源洞豐甫之子昇叔明伯紀之弟經叔易綸
李言甥張津子知同來紹興元年五月二日

陳畧云在石門左紹興元年公方罷相提舉洞霄宮寓居福州故得徇
伴巖壑越歲遂有觀文之命出鎮荆湖矣

馮志云紹興初綱以張魏公之劾罷爲觀文殿學士提舉洞霄宮未幾

落職史但言其居鄂州二年即起知潭州中間未嘗言歸閩

衍案中興小紀宋史全文皆言紹興元年韓世忠討范汝爲先至福州見李綱綱謂曰建州百姓多無辜世忠受教則此時綱固在福州矣

宋詩紀事云王仲薏字豐父丞相珪少子政和中守會稽後擢待制建炎初知袁州金人入江西坐失守削籍時秦檜當國爲其兄仲山壻啟懇開陳詔復元官

孟庾等烏石山題名

在侯官

紹興二年

參知政事孟庾宣撫閩部按視城守回邀嗣濮王仲湜資政殿大學士李綱龍圖閣直學士許份顯謨閣待制王仲薏監察御史福建撫諭胡世將集英殿修撰知福州事程邁前右正言鄧肅參議官尙書屯田員外郎李易機宜朝散郎胡紉幹辦公事直秘閣馬咸承議郎鄭士彥會於烏石山之長樂臺瑞雲庵紹興壬子正月二十一日

陳畧云宋史高宗紀紹興元年十月以孟庾參知政事范汝爲復叛入

建州十一月以庾爲福建江西荊湖宣撫使副以韓世忠討之二年正月世忠拔建州汝爲自焚死餘黨悉平李綱傳紹興二年二月復除湖廣宣撫使兼知潭州此題蓋奉祠寓居福州時事也許份字子文閩縣人崇寧二年進士累官龍圖閣學士宋史附名其父將傳王仲凝字豐甫華陽人見李忠定鼓山題名胡世將晉陵人宋史本傳云字承公與兄唐老同登進士范汝爲寇閩以爲監察御史福建路撫諭使賊平遷右司員外郎程邁字晉道黟縣人官閩多治績自有題名鄧肅字志宏沙縣人宋史本傳謂紹興二年避寇福唐正此時也考職官志宣撫使不常置以二府大臣充副使掌貳使事有不置使而置副亦有身爲正使兼領副使其屬有參謀官參議官機宜幹辦公事此題名若李易胡紡馬咸鄭士彥皆其僚佐也

烏石山志云長樂臺在千福院後梁乾化三年建今廢程師孟楷書鐫長樂臺三字宿雲臺卽瑞雲臺久廢雲道人名一作庵

葉記云紹興元年九月遣胡世將督捕福建盜賊程邁元符三年進士建炎四年知福州領安撫使建寇范汝爲方熾邁乞師於朝朝命邁會討降之明年復叛邁合宣撫使孟庾副使韓世忠感賊於建州鄭士彥紹興閒任福建轉運副使

宋詩紀事云李易字順之江都人建炎二年高宗駐蹕維揚策進士爲第一授簽書江陰軍判官紹興元年博士轉工部員外郎

宋詩紀事拾遺云胡世將字永公

潘正夫烏石山題名

在侯官

紹興二年

靖康之間金人犯闕二聖北遷逮建炎中興天子受命吳國長公主始至睢陽明年寇淮甸遂浮江而南避於錢塘車駕幸建康還復入覲繼適江表會胡騎奄至循贛水走湘湖瀕南海而達閩川館於福唐之神光因登烏石山觀李陽冰篆乃得古人之遺意越五日而赴行在所男長卿粹卿端卿溫卿侍紹興二年仲春十三日河南潘正夫題

陳畧云在霹靂岩案宋史吳國長公主哲宗女出降潘正夫子溫卿長卿端卿清卿墨卿才卿凡六人與此序次不同亦無粹卿之名疑史有誤

衍案正夫字蒙著河南人官至太傅

李忠定題顯應廟詩

在寧化

紹興二年

不愁芒屨長南謫滿願靈旂助北征
酹徹一桮揩淚眼煙雲何處是二京
舊歲新皇光嗣寶祿予被命拜相獻恢復中原之策上不採用兩閱月予
以觀文學士出知潭州今改洪州復改福州自洪抵吉贛來福道寧化行
倦憇草倉祠下因拜神坐閒思憶一帝有感作一絕寫懷兼寓行蹤云時
大宋紹興二年壬子夏五月吉日金紫光祿大夫平章政事樵川李綱書
陳略云詩在寧化草倉寺之壁李方伯賡芸炳燭編辯其僞云公以建
炎元年八月轉銀青光祿大夫尚書右僕射兼門下侍郎至紹興二年
已閱六載似未可以爲舊歲也在政地七十餘日亦不止兩閱月旣罷

相除觀文殿大學士提舉杭州洞霄宮無知潭州之命紹興二年始除
觀文殿學士充荆湖廣南路宣撫使兼知潭州歲月雖與壁記頗合然
起於奉祠非由洪改福且公從未知福州其知洪州尙在五年也又廿
二年始改虔州爲贛州是時不應有贛之稱唐宋宰相有同平章事無
平章政事所題金紫等十字殊謬公轉金紫光祿大夫尙在七年石壁
記蓋無一合者出於後人依託固自顯然

道光舊志云廟爲草倉將軍姓長孫名山

程邁等烏石山題名

在侯官

紹興二年

紹興壬子仲秋新安程邁晉道東萊徐宇持志東武侯懋仲勉吳興劉嶠
仲高同登烏石山徧遊諸刹王僧摩巖以待時貪過九仙訪三十三奇未
暇留字晉道還朝既迫季秋七日約復來道山亭是日天氣澄爽置酒高
會以極登覽之勝悵念艱虞以來盍簪之樂曾不易得蓋重於此作別云
陳畧云在桃石程邁以建炎四年知福州兼安撫使徐宇侯懋皆轉運

判官劉嶠歸安人紹興二年以直徽猷閣提刑福建九仙山亦有邁等四人題名蓋同一時也

馮志云邁黔人仕爲顯謨閣學士衍案黔當黔字之譌

葉記云以紹興二年九月去十二年再知福州

程晉道等于山廓然臺題名

在閩縣

紹興二年

程晉道解帥事行將造闕前一日拉徐持志劉仲高同訪小華峯登廓然臺憩野意亭超然遐矚危岑列岫盡落樽俎閒晉道此行若登仙而居者無路挽留不得從容物外之樂殊爲大恨紹興壬子季秋十一日時侯他勉以疾不至

葉記云晉道程邁字仲高劉嶠字仲勉侯懋字此與烏石山桃石題名同時事也

道光志云廓然臺在平遠臺東

閩都記云小華峯在山之南有石刻三字

鄭滋等于山題名

在閩縣

紹興二年

齊口鄭滋德象吳興劉嶠仲高穎川范正國子儀同飯素於萬歲寺烹茶
金粟臺登三山閣觀閩王所施織錦及佛時口雪初霽江山明潤顧望久
之遂過野意亭紹興二年季冬朔辛炳如晦以幹不至

陳畧云篆書在平遠臺劉嶠時提刑福建辛炳侯官人元符三年進士
官殿中侍御史蔡京謫南劍州

三山志云三山閣在平遠臺東

宋詩紀事云鄭滋大觀中臨晉縣主簿

飛來山題字

在福州

飛山

三山志懷安縣賢沙寺下云飛來山在寺前寺門有飛山二字劉提刑
嶠書

衍案三山志作飛山亦未云刻石馮志云石刻飛來二字道光志亦云

石刻飛來皆與三山志不合惟西湖志作飛山云在玄沙山玄沙又賢沙之謬賢沙寺在懷賢里三山志作賢不作玄嶠歸安人紹興二年任

重建文宣王殿記

在浦城

紹興四年

自周道衰微至于戰國干戈日尋帝王之迹熄而典章文物淪喪無遺矣孔子于是時窮爲旅人無所用于世退而刪詩書定禮樂而先王所以爲治之道煥然者在方冊使後世有考焉論其功謂賢于堯舜豈虛語哉故廟食百世雖天子之尊北面而奉之爲道之存非以是爲榮觀也國家慶曆中詔天下郡縣立學是時陳公先生襄以經術德義爲一時儒宗適主縣簿孜孜以教育人材爲務乃與其令謀即縣之東南隅築宮於其上以延後學邑人徐翹營殿于其中不侈不陋故三舍行堂廡一新至建炎初爲賊火所焚而殿得以獨存春秋口以奉祀紹興三年冬縣令吳侯來視事之始歷告諸神祠獨吾聖師無瞻依之所喟然嘆曰今老佛之徒獨知嚴事其師而吾徒獨不知之耶于是慨然有建立之意不數月召邑之諸

生劉壽英元賓吳震全疇相與董其事經始于四年中夏落成於秋七月
良材堅壁增于前用人之力與塑繪之工其費無慮百餘萬人樂輸之不
爲厲旣而邑之士蕭顗以吳侯之書走吏詣予求文以爲記予爲之言曰
學之廢久矣詖淫邪遁之辭盈天下士溺於所習冥行而已予嘗考之周
官司徒以知仁聖義忠和六德教萬民夫仁與聖孔子不敢居而先王以
是教萬民者蓋天地萬物一性耳無聖賢知愚之異故顏子曰舜何人也
予何人也有爲者亦若是孟子嘗曰人皆可以爲堯舜故學者必以聖人
爲師猶之射者棲鵠於侯以爲的惟巧力具然後能中巧而不至而不中
蓋有之矣然不爲之的則莫知孰爲中否也司徒以仁聖教民蓋亦棲鵠
之義與之爲的耳然仁之爲仁聖之爲聖必有在矣學者未知仁聖之所
以爲仁聖雖有學猶虛器也世之論者以謂仁愛而已矣蓋未嘗究觀孔
子之言耳知孔子之言仁則聖亦從而可知矣夫浦城之爲邑蓋東南賢
士大夫之材藪英才異稟出而擢高科登顯仕進秉鈞軸者世有人焉吳